



Inatsisartunut ilaasortaq Andreas Uldum
Inatsisartut Allattoqarfiat
Postboks 1060
3900 Nuuk

Poortuutissat puiaasaaqqallu immiaaqqanut imeruersaatinullu kulsyremik akulinnut atorneqartartut aallaqqaataaniit naggataanut atorneqartarnerat pillugu misissuittisinissamut aamma puiaasaaqqat utertittakkat avammut ammanerulersinniarlugit nutarteriffiginissaat pillugit § 37, imm. 1 naapertorlugu apeqqummut akissut

Asasara Andreas Uldum,

Inatsisartut suleriaasianni § 37, imm. 1 naapertorlugu Naalakkersuisunut marlunnik apeqquqteqarputit, puiaasaaqqat utertittakkat avammut ammanerulersinniarlugit nutarteriffiginissaat aamma poortuutissat puiaasaaqqallu immiaaqqanut imeruersaatinullu kulsyremik akulinnut atorneqartartut aallaqqaataaniit naggataanut atorneqartarnerat pillugu misissuittisinissamut tunngasunik.

1. *Poortuutissat puiaasaaqqallu aallaqqaataaniit naggataanut atorneqartarnerat pillugu misissuittisinissamut neriorsuut sumut killippa?*

Aalajangiunneqarpoq aallaqqaataaniit naggataanut misissuineq poortuutissat assigiinngitsukkaanut ikinnerpaamik tallimat misissorneqassasut, matumani ilanngullugu puiaasaaqqat assigiinngitsukkaat utertitsisarnermik aaqqissuussinnermut maanna atuuttumi ilaatinneqartut. Aallaqqaataaniit naggataanut atorneqartarnerat pillugu misissuinnermi ilaatinneqassapputtaaq Nunatsinni ullumikkut viinnit, imeruersaatillu imigassamik aalakoornartumik akullit aamma nerisassat asiunaveersakkat puui igalaamerngit iginneqartarneri pillugit avatangiisinut sunniutaasa naliliiffigineqarnerat aamma poorineqartartut taakku siunissami qanoq iliorluni iginneqartarnerat isumagineqassanersut.

Taamaammat Nunamut Namminermut, Pinngortitamut Avatangiisinullu Naalakkersuisoqarfiup 2011-mi januarip qaammataani Institut for Produktudvikling (IPU) isumaqatiginninniarfigaa poortuutissat aallaqqaataaniit naggataanut atorneqartarnerat pillugu misissuinnissap suliarineqarnissaanik. Poortuutissat aallaqqaataaniit naggataanut atorneqartarnerat pillugu misissuinnissami, matumani poortuutissat assigiinngitsukkaat tallimanit amerlanerusut ilaatinneqassanersut, piffissami qaninnermi aalajangiunneqarumaarpoq. Qanoq amerlatigisut ilaatinneqarnissaanni Aningaasanut inatsimmi aningaasaliissutit mianerineqartussaapput kisianni aamma poortuutissat aallaqqaataaniit naggataanut atorneqartarnerat pillugu misissuinnissami poortuutissanut tunngatillugu siunissami aalajangiisarnissami sapinngisamik pitsaanerpaamik tunngaveqarnissaq, matumani ilanngullugu utertitsisarnermi aaqqissuussinnerup qanoq annertutigisumik ammanerulersinneqassanersoq. Taamatuttaaq suleqatigiissitamik

18. februar 2011
Sagsnr. 2011-044934
Dok. Nr. 550011

Postboks 1614
3900 Nuuk
Tlf. (+299) 34 50 00
Fax (+299) 32 52 86
E-mail: npan@gh.gl
www.nanoq.gl

poortuutissat aallaqqaataaniit naggataanut atorneqartarnerat pillugu nalilersuinissap suliarineqarnissaanik isumaginnittussamik pilersitsisoqarpoq.

Naalackersuisut siunertaraat poortuutissat assigiinngitsukkaat toqqarneqartut aallaqqaataaniit naggataanut atorneqartarnerat pillugu misissuineq aallaavigalugu nalilersuineq naammassineqassasoq aasami 2011-mi. Tamatuma kingorna siunertarineqarpoq, misissuinermit inerniliinerit poortuutissat pillugu nutaamik nalunaarummik suliaqarnermi atorneqassasut.

*2. Puaasaaqqat utertittakkat avammut ammanerulersinniarlugit
nutarteriffiginissaat pilersaarutaava?*

Ilisimatitsissutigineqarsinnaavoq Naalackersuisut UPA 2010/43-mut tunngatillugu akissuteqaammi oqaatigimmassuk, utertitsisarnermik aaqqissuussinerup ammanerulersinneqarnissaata inuiaqatigiinnut kingunissai misissoqissaarneqassasut. Poortuutissat aallaqqaataaniit naggataanut atorneqartarnerat pillugu misissuinerup inernerit tunngavigalugit Naalackersuisut erseqqinnerusumik nalilersuissapput ammanerulersitsisoqassanersoq.

Inussiarnersumik inuulluaqqusillunga

Anthon Frederiksen